

Date – 18/11/2025
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Chief Minister hova Council of Minister meeting chuan tun November thla ni 1 atanga hman turin sorkar hnathawk hlawh Dearness Allowances zaa 4-a tihpun a remti.
2. Dampa Assembly bial bye-election-a thlan tlin Dr. R. Lalthangliana chu vawiin hian MLA atan lakluh a ni ang.
3. Prime Minister Narendra Modia chuan Insia chuan thang zel turin chak takin kal mek tih sawiin hmasawinna thlen tur leh mahni intodelh turin theihtawp a chhuah a ti.
4. Bangladesh Prime Minister hlui Sheikh Hasina leh Home Minister hlui Asaduzzaman Khan Kamal te chu Dhaka-a International Crimes Tribunal chuan thi turin an chungthu a rel.

<><><>

COUNCIL OF MINISTERS MEETING

Chief Minister Pu Lalduhoma kaihhruaiin Council of Ministers meeting chu Chief Minister Office Cabinet Room-ah nimin khan neih a ni a.

Meeting hian, tun November thla ni 1 atanga sorkar hnathawk hlawh Dearness Allowances zaa 4-a tihpun a remti a, nakum April ni 1 a zaa 2 a tihpun leh a remti bawk.

Meeting hian, Anti- Corruption Bureau (ACB) a deputation-a thawk police personnel leh staff, ASI rank leh a hnuai lamte chu Special Incentive Allowance pek an remti bawk a ni.

<><><>

MPSC

Mizoram Public Service Commission (MPSC) chuan sorkar kum liamta kum April 1 2024 atanga March 31, 2025 chhung khan sorkar hna 349 atan hnalakna advertisement 55 a tichhuak a, hemi chhung vek hian RTI hmanga zawhna 1056 an dawng.

MPSC-in 34th Annual Report 2024-25 a tihchhuah thara a tarlan danin, MPSC hian kum 2024-25 chhung khan sorkar hna (post) 349 atana advertisement 55-a tihchhuahah hian dilna 65,850 a lut a, dilna 2,201 hnawl niin, written exam tum 30 leh personal interview tum 22 an buatsaih hman a ni.

MPSC hian sorkar kum liamta chhung khan Courts case pathum am nei a, heng zinga 1 hi chinfel tawh niin MPSC an chak a, a dang 2 hi Supreme Court ngaihtuah turin ala awm mek a ni.

Kum 2024-25 chhung khan MPSC hian online leh kutziak hmangin RTI zawhna 1,056 dawngin, RTI hmanga zawhna a dawnte hi hna exam-naa mark hmuh zat zawhna leh exam kaihhnawih thil dang hrang hrang a ni tlangpui tih MPSC hotute chuan Akashvani News, Aizawl an hrilh a; chhanna an pek zingah chhanna an pekte dukhawp loh vangin zualko vawi khatna (first appeal) 29 an dawng a, hengah hian chhanna pein, zualko vawi hnihna (second appeal) erawh an dawng lo thung.

Mizoram State Information Commission chuan MPSC hnenah hian RTI zawhna an chhan that avangin RTI Excellence Award 2024-25 lawmman pakhatna a hlan a ni.

<><><>

KOLASIB DISHA

Kolasib District Development Coordination and Monitoring Committee (DISHA) meeting chu DC Conference Hall, Kolasib-ah Lok Sabha MP Pu Richard Vanlalmangaiha kaihhruaiin nimin khan an thukhawm a,

Pu Richard Vanlalmangaiha chuan thu sawiin, Mizoram-in MP pakhat chauh a neih avang leh District 11 a awm si avangin, DISHA danin quarter tina meeting neih tura a tih chu a dan ang thlap a kalpui a harsat thu a sawi a. MP chuan kawngpui thawmthat chungchang sawi langin, NHIDCL aiawh lo kalte hnenah an kawng siam hna chu chak zawka thawk turin a hrilh a. NH-306 leh NH-06 te chu Mizoram "chak lakna ber" a nih hria a, tun aia chak zawk a thawk turin leh an hun tiam chhunga zo turin a hrilh.

DISHA hi District Development Coordination and Monitoring Committee a ni a, India Sorkar laipui-in District tina a din a ni. A tum ber chu Sorkar Laipui scheme hrang hrang (Centrally Sponsored Schemes) te a taka kalpui a nih dan uluk taka endik (monitor) leh thawhhona tha (coordination) a awm theih nana hma lakna a ni. He committee-ah hian MP te hi Chairman niin, hmasawmna hnathawh mek Department ten an kalpui dan te leh harsatna awm te sut kian dan an ngaihtuah ho thin a ni.

Meeting-ah hian Kolasiba sorkar Department hrang hrang aiawhte kalkhawmin, an Department hmalakna te an tarlang a. He hunah hian MP hi Pu Lalfamkima, Deputy Speaker, Mizoram Legislative Assembly leh Pu Robert C Lalmangaiha, Kolasib DC leh DISHA Member Secretary ni bawk ten an tawiawm a ni.

<><><>

MLA OATH TAKING

Dampa Assembly bial bye-election-a thlan tlin Dr. R. Lalthangliana chu wawiin hian MLA atan lakluh a ni dawn.

Dampa Bialtu MLA Pu Lalrintluanga Sailo, kumin July ni 21-a a thih avanga Dampa biala tun thla ni 11- a bye-election inthlan vote thlakah khan MNF candidate Dr. R. Lalthangliana chu thlan tlin a ni a, wawiin chawhma dar 11:00 ah Assembly Conference Hall, Annexe Building-ah Assembly Speaker Pu Lalbiakzama chuan rinawmna thuthiam tirin MLA atan a la lut ang.

Dr R. Lalthangliana hian kum 1986-ah MNF Party zawmin party chhungah nihna hrang hrang chelhin tunah hian Sr. Vice President ni lai a ni a, Term ruk zet MLA ni tawhin Lunglei North bialah a zawnin vawi 5 chhûng MLA ah thlan tlin a ni

a, South Tuipui (Hnahthial) bialah vawi khat tlingin Mizoram MLA zingah chatlak awm lova mahni biala tling rei ber a ni. Term 6 chhung MLA a nih lai hian Cabinet Minister term thum a chelh a, hengah hian Department hrang hrang enkawlin hna alo thawk tawh a. Tunah hian Dampa bialah thlan tlin leh niin hei hi a vawi 7 MLA nihna tur a ni dawn a ni.

Nimin khan MNF Party chuan Aizawl Vanapa Hall-ah Dampa Bial by-election 2025 a Dr R Lalthangliana thlan tlin a nih pualin 'Pathian hnena lawmthu sawi inkhawm' an hmang a;

MNF president Pu Zoramthanga chuan thu sawiin, MNF hruaitute inkarah buaina a awm lo a ti a, inthlannaa an chak hnuah chanvo inchuhin an buai dawn an ti a, hetiang lamah hian MNF an buai ve ngai lo a an buai dawn lo a ti. Mizoram mipuiin ZPM sorkar leh an policy-te an hnawl tan ta a ti a, Mizorama inthlan lo awm zel tur atan Dampa By-election chu darthlalang ang a ni a, Zoram mipui hmuh dan a nih thu leh Bana Kaih Policy te, ZPM sorkar leh an hruaitute hnawl an nih mek thu a sawi bawk.

Dampa Assembly bial MLA thar Dr R Lalthangliana chuan thlan tlin a nihna chu Pathian vang a nih thu a sawi a; tling ve ta lo party dang candidate-te chu hmelma an nih loh thu sawiin, a tawngtaisak zawk thu a sawi a, campaign chhungin boruak chhia a thleng lo chu a lawm thu leh vote 562-a a tling chu a chapo lohna tura Pathianin a tawk chauha atana a ruat a nih thu a sawi.

MNF party worker-te chu chapona tlang atangin hlawhtlinna a awm thei lo tih hre tura a duh thu sawiin Dr R Lalthangliana chuan, inthlan kaihnawihha Mizoram People Forum (MPF)-te hmalakna fakawm a tih thu a sawi bawk.

Dampa bial by-election neih zawh taka hnehna chang zo ta lo Pu Vanlalsailova chuan vawiina ZPM Party chhung inkhawm Aizawla neihah thusawiin an chak loh avanga tute emaw mawhpuh kual tur a zawng lo va, a chhan bul ber chu amah a ni tih a pawm thlap a ti a. He chak lohna hi an inhmuh chhuah nan Lalpa'n malsawm se a duh tih sawiin kum 2023 inthlanpuia kalphung thar mipui sorkar a din theihna tura a thli tlehtirtute zinga hmanruaah Pathianin a hmang ve a; mahse, inthlanah a tling zo lo a. By election-ah a tling lo leh ta a, a tuartu leh hrehawm ti ber chu amah a ni a, mahse, ZPM thil tum tihlawhtlinna turin tuna a dinhmun chu darthlalang atan a rawn hungah a ngai a, theih tawp chhuahin he ram tan hma a la zel dawn a ti.

Dampa Bial By-election BJP Candidate Pu Lalhmingthanga pawhin nimina Aizawla an party office ah thusawiin, Dampa bial By-Election ah BJP-in an beisei Result an hmu lo a, hemi ah hian mawhpuh tur mimal ah an awm lo a ti a, BJP ka chhuahsan leh mai ring mi tam tak an awm a, nimahsela BJP chhuahsan a tum lo a ti.

Dampa bial ah BJP Member tak tak an tlem hrih hle a, an bul tanna a têt deuh bik êm avangin, hmalak a harsa bik a, Dampa bial ah hian BJP a din chhuahna atan theihtâwp chhuahin hma an la zel dawn a ti.

Congress party chuan Congress Bhavan ah Political Session an hmang a, MPCC thupuangtu Pu Lalbiakzama chuan Zoram mipuiten Congress nge nge an ti

leh dawn a ti a, an sulhnu a tha ber a ti a, vawiina sorkar mekte chu thal vawi 2 an paltlang tawh hnu pawha kawngpui la siam thei lo an ni a. Development dang chu vana rah ang a ni, a ti.

MNF chu vawi tam sorkar tawh, ram tana hma an lak dan pawh mipuiin an hriat tawh hnu a ni a. An tlinna bial ni sa, Dampa bialah an chak nawn leh a. Sorkar lai leh tlingsa bialah Congress an inrawlh ang chauh a ni a, Pu John Rotluangliana chuan hnuai lam atangin a kek ve ngar ngar ang a ni chauh a. Tuna Dampa bial inthlan hi ram puma boruak kal dan tur a hril phak lo a ti.

<><><>

MALARIA

Siaha District ah, kum kal mek January atang October thleng khan Malaria sikserh natna vei 1111 hmuchhuah a ni tawh.

Siaha District Chief Medical Officer (CMO) office chhinchhiah danin kumin kal mek January atang October thleng khan thisen sample 14689 chu sikserh an vei leh vei lo enfiah niin, heng zinga 1111 hi sikserh natna vei anni tih hmuchhuah a ni a, Sikserh natna vei zing ah hian Malaria Plasmodium vivax (Pv) vei 782 awmin Malaria Plasmodium falciparum (Pf) vei 329 an awm thung a ni.

District hotute sawi danin Nikum (2024) January atang October thleng khan sikserh vei hi 1523 an awm a, kumina sikserh vei hi nikum nen a khaikhin chuan 417 lain a tlahniam thung a ni.

Thudawn dan in, Siaha District ah sikserh natna avanga thi chhinchhiah hnuhnun ber chu kum 2015 a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan Insia chuan thang zel turin chak takin kal mek tih sawiin hmasawinna thlen tur leh mahni intodelh turin theihtawp a chhuah a ti. New Delhi-a Ramnath Goenka Lecture vawi 6-naah he thu hi sawiin Pu Modia chuan kum zabi 21 chuankai hnua kum 25 liamta chung khan chak takin thil engkim a kal tih sawiin chona thar a rawn in dawt zut a ti a. Heti chung hian India chu dan rual lohin hmasawn zawngin a kal tih a sawi a. Vawiinah chuan Indian Growth Model chu khawvelin beiseina atan an thlir thup a ti bawk.

<><><>

BANGLADESH

Bangladesh Prime Minister hlui Sheikh Hasina leh Home Minister hlui Asaduzzaman Khan Kamal te chu Dhaka-a International Crimes Tribunal chuan thi turin an chungthu a rel. Bangladesh hruaitu hlui pahnihte hi court ah an inlan lo

a.Nikuma zirlaite nawrhna khap bet tura tharum hmanga mihring dikna chanvo nasa taka rapbetah puh an ni a. Member pathum awmna bench Justice Mohd Golam Mortuza Majumder-a kaihhruai chuan Police Inspector General hlui Chowdhury Abdullah Al-Mamun chu kum nga jail tang turin a hrem baw k a ni.

<><><>